

Skipulags- og umhverfísráð Akraneskaupstaðar
Sigurður Páll Harðarson
Skiptiholti 16-18
300 Akranes

Reykjavík, 19. janúar 2016

Efni: Fiskþurrkun HB Granda hf.

Vísað er til umsóknar HB Granda dags. 23.01.2014 um stækkun lóðar og deiliskipulagstillögu sem hefur verið í vinnslu og til umfjöllunar í kjölfarið. Einnig er vísað til bréfs HB Granda dags. 9.7.2015 með greinargerð um áform félagsins. Deiliskipulagstillagan er nú lögð fram að nýju eftir nokkrar breytingar, bæði efnislegar og í framsetningu uppdráttar, en auk þess hefur ítarleg umhverfisskýrsla verið unnin og er nú hluti framlagðrar deiliskipulagstillögu. Flest efnisatriði bréfs HB Granda frá 9.7.2015 eru nú komin inn í umhverfisskýrsluna.

1. Formáli

Í ágúst 2013 samþykkti stjórn HB Granda kaup á Laugafiski ehf. sem rak fiskþurrkun á Akranesi. Stjórn félagsins gerði sér grein fyrir að komið væri að mikilli endurnýjun í þurrkuninni. Aðstaðan til eftirþurrkunar fullnægði ekki kröfum um vinnslu matvæla og vinnslan olli of mikilli lyktarmengun. Það lá því fyrir áætlun um verulega uppbyggingu og endurbætur á þurrkuninni við kaupin. Markmið uppbyggingarinnar voru skýr, þ.e. að bæta vinnsluferla og draga verulega úr lykt frá starfsemi, og þótti ljóst að þeim væri hægt að ná fram. Kaup félagsins á Laugafiski grundvölluðust á staðsetningunni. Hagræðið í því að hafa fiskþurrkun í næsta húsi við bolfiskvinnsluna er mikið, minnkar verulega svokallað sótspor og býður upp á aukin gæði vegna minni flutninga. Forráðamenn félagsins töldu að því yrði vel tekið að dregið yrði verulega úr lykt af starfsemi og hefðu ekki fest kaup á Laugafiski ehf. ef ljóst hefði verið að áhöld væru um hvort starfsemi fengi að vera á staðnum.

2. Núverandi aðstaða

Núverandi aðstaða félagsins til fiskþurrkunar er sem kunnugt er óviðunandi. Aðstæður gera ekkert annað en slakna með tímanum en fjárfestingar í betri búnaði o.fl. hafa dregist á langinn á meðan framtíð þurrkunarinnar er í óvissu. Þetta á ekki einungis við um eftirþurrkunina við Vesturgötu heldur einnig forþurrkunina að Breiðagötu.

3. Tilhögun framkvæmda

Að fengnu leyfi til framkvæmda mun félagið hraða þeim sem kostur er enda farið að reyna á biðlund forráðamanna félagsins (og fleiri) að geta dregið úr lykt frá starfseminni. Framkvæmdirnar verða áfangaskiptar:

Áfangi 1: Ráðist verður í þennan áfanga svo fljótt sem auðið er. Ný eftirþurrkun, rými fyrir þurrkjöfnun og pökkun.

Áfangi 2: Ráðist verður í framkvæmdir þegar aðgengi fæst að heitu vatni og landfylling verður til staðar, hugsanlega 2017. Hér er um að ræða aðra aðferð við þurrkun eða færibandaklefa og eftirþurrkun við hann.

4. Lokaorð

Það er HB Granda nokkurt kappsmál að fá niðurstöðu í þetta mál sem fyrst. Félagið mun standa að framkvæmdum eins og best verður á kosið og hraða þeim eins og mögulegt er. Við teljum fullvíst að draga muni verulega úr lyktaróþægindum vegna starfseminnar í kjölfar umræddra framkvæmda. Það er hins vegar ljóst að ekki verður alfarið komið í veg fyrir lykt af fiskþurrkun frekar en annarri vinnslu á fiski.

F.h. HB Granda hf.



Vilhjálmur Vilhjálmsson, forstjóri